



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 7

Yangia anidakangma :

f Tir Yimiyim

ig tiryimiyim@aolima

yt tir yimiyim

TAPAK 8

France Tir Macron-i anogo
ana atema Serbia semdang

Darwin Nunez nem asaya 5
atema tenokdangba agütsü

VOL. XXI ISSUE NO. 317 (ADOK 317)

DIMAPUR ROGONÜ (FRIDAY)

LUROI (AUGUST) 30, 2024

₹ 5.00



Nagaland Angh La Ganesan-i August 29, 2024 nü India Ato Kilonser Narendra Modi den par kidang ajurutepa Nagaland state dak sendakba ken o balala jembia liasü.

Nagaland Assembly nung bill trok agizükogo

Kohima, Luroi/August 29 (TYO): Nagaland Legislative Assembly nung Brehostibarnü government bill trok tashi voice vote ajanga agizükogo.

Brehostibarnü agizükba bill temji The Nagaland Goods and Services Tax (Ninth Amendment) Bill, 2024, The Nagaland Work-Charged and Casual Employees Regulation (First Amendment) Bill, 2024, The Nagaland Municipal (Amendment) Bill, 2024 aser "Disqualification on Ground of Defection in Urban Local Bodies Bill, 2024 alitsü.

Item bill agizüksü atema Nagaland Chief Minister Neiphiu

Rio-i benoka liasü.

Deputy Chief Minister T. R. Zeliang-i The Nagaland Road Safety Authority (Second Amendment) Bill, 2024 benok aser Minister Temjen Imna Along-i The Global Open University Nagaland (Second Amendment) Bill, 2024 benoka liasü.

House nung Bills trok ya Mongulbarnü benok aser züngsem temi temelenshitsu onük mebenok, ta NLA Speaker Sharingain Longkumer-i metetdaksü.

Iba sülen pai item bill agizüka ayutsü atema House nung voice vote agitepa agizüka liasü.

Nagaland-i illegal Bangladesh immigrants aitba mali: Y Patton

Kohima, Luroi/August 29 (TYO): Bangladeshi nung tang mepetmesü adoka aliba ajanga ozüng alema Bangladesh immigrants tem state-i aitba osang mali, ta Nagaland Deputy Chief Minister Y Patton-i Brehostibarnü ashi.

Bangladesh nung sorkar anema nokdakba ajanga iba linük nungi nürburtem senoka aita alitsü akok ta NPF MLA Achumbemo Kikon-i State Assembly nung Zero Hour mapang teblemstü lemsatepba langzüdang Patton-i iba telangzüba ya agütsü.

Bangladesh den international border lemsatepa aliba North East region ya iba timtem ajurutsü temelatiba lir aser danga state tem nungi Nagaland-i illegal immigrants tem aita alitsü akok, ta Kikon-i ashi.

Iba atema pai state sorkar dang Bangladesh nungi illegal immigrants tem aitba nokdangtsü asoshi mera agitsü ayongzüka liasü.

Kikon-i süokba onük nung telangzüba agütsüdüang, India ya Bangladesh den arütsü kilometre 4096 lir aser yangji West Bengal ya arütsü talangtiba (2217 kms) aser Assam ya arütsü tatsütiba (262 kms) lir, ta Deputy CM (Home) Patton-i ashi.

Iba den danga state asem - Mizoram, Meghalaya aser Tripura

ya Bangladesh den arütsüa lir, saka Nagaland mali, ta pai ashi.

State-i illegal immigrants tem aitunga Assam ajanga aittsü, anungji state sorkar nüba-nüyima malir aser itdangiter aser danga agency den teka amteper tensa kanga junga meiter, ta pai House nung metetdaksü.

"Yamaji mataloktsü aser nürburtem mulungjang nungi tetsübo samadaksütsü mechi asenoki mera balala agitar aser Assam den arütsüa aliba district administration tem dang mapang shia danga security forces den district level security coordination meeting amentsü totuyuba agütsüogo," ta Patton-i ashi.

Ozüng alema aiterem nokdangtsü mechi district nem mera agitsü tejangja totuyuba agüja inyaktar, ta ashi.

Iba atema Deputy Commissioner tem dang Assam nung kasa ketdangtsür den osangtsüsang agiteptsü, Inner Line Permit tesashiba repranga inter-state check post tem nung saksalema alitsü shiogo, ta pai ashi.

State police dang inter-state arütsü tesem 13 nung saksalema alitsü tuyuogo aser gari senzüba kanga junga meitsü aser tekülem agiba tesemtem nunga tenük yoktsü shia lir, ta Deputy CM Patton-i ashi.

FA aser Agreed Position yimjak nung sangdongtsüla

Kohima, Luroi/August 29 (TYO): Naga Political Issue (NPI) dak sendakba nung Centre aser Naga nung telok balala tsüngta tezüngzüktep tongtipang ana agitepa aliba ya yimjak nung sangdonga tarutsü asoshi kanga junga jembishinür telemetba agitsü nüngdaker, ta Nagaland Legislative Assembly nung jembia liasü.

Government of India (GoI) ajanga NSCN-IM den 1997 küm ceasefire agreement zülutep aser August 3, 2015 nung Framework Agreement zülutepa liasü.

Ano 2017 küm Naga National Political Groups (NNPGs) indang Working Committee den jembishinü balaka tenzüka kasa küm November 17 nü Agreed Position zülutepa liasü.

Ajisüaka tanü tashi tangatettep kati maruteti lir, aser NSCN-IM ya nisan aser constitution balaka aser Naga nung aliba tesem ajunga ka kumdaksütsü akhangba nung akang-akanga nokdaka lir.

Solution tatem kati arutsü mapang atsülangba atema teblemstü lemsatepa Nagaland Assembly nung iba ken o ya 'matter of public importance' ama Brehostibarnü benoka jembia liasü.

Naga nung timtema aruba nung tekeratiba nung tangatettep kati arutsü asoshi inyaktepba nung yariteptsü mechi Nagaland nung

political party toku nungi House nung züngsem 60 prongla kungjemer opposition maliba sorkar ka kumtet.

Iba ken o ya NPF MLA Kuzholuzo Nienu-i benok aser züngsem 12-i shilem agia jembia agreement ana ya Naga nürburtem asoshi yimjak nung sangdongtsü nüngdaker, ta jembia liasü.

"FA aser AP nung aliba ya nürburtem nem metetdaksütsüla aser Naga nungeri solution asü sovereignty aginer, aji parnok nem lemtetdaksütsüla," ta NPP MLA Nuklutoshi-i ashi.

Naga yimten ken o jembishinüba nung teyarir ka ama state sorkari sapang agütsür yimsüng nung lenirtem, kin balala lenirtem, civil societies, tetsü tem aser Naga nungeri temeteter jaoka jembishinüa Naga nungeri tia teti atema lemtetdaksütsüla, kechiaser Naga political solution dang tongtipangba kecha mali, ta pai ashi.

Minister G Kaito Aye-i Framework Agreement aser Agreed Position zülutepa aliba nung anidaksü atema GoI aser Naga negotiators den jembishinütsü state sorkar dang ajungshia liasü.

"Mangatettep alibatem bentetsüla, kechiaser Naga nungeri telok balala jateta adokba ajanga ceasefire ground rules mamshiteter aser tapi agi senotsü saruba, merenshiba aser ozüng alema mapa

inyakba ajanga nürburtem dang tim atemer," ta pai ashi.

Iba ken o jembia tembanga Chief Minister Neiphiu Rio-i ashiba agi, facilitator ka ama legislator tem Constitution of India-i alena lir aser iba ken o nung shilem agitsü sadema mali.

State anguba sülen NPI atema state sorkari pangzüng trok renema lir aser state nung civil society aser tribal body tem den shisadokden senden amandang pangzüng pongu renema lir, ta pai ashi.

Centre-i Naga nungeri telok balala dang parnoki akhangba shilem 80 agizüksü aser tanünga shilem 20 ya iba sülen jembitsü asüdüdanga lir, ta pai House nung metetdaksü.

NNPGs indang Working Committee-ibo ibaji agizüksü mulunga aliba lemsatepogo, saka NSCN-IM-i magizükter, ta ashi.

Paia Centre-i maongka agütsüba Naga nungeri agizüka tanünga ken o maneni jembitsüla, ta ashi.

Iba ken o jembia nung LJP (RV) MLA Sukhato A. Sema, BJP MLA Imkong L. Imchen, NPF MLA Achumbemo Kikon, RPI(A) MLA Y Limaonen Chang, JD(U) MLA Jwenga Seb, Independent MLA Dr Neisatuo Mero, NDPP MLA Nyusitho Nyuthe, LJP (RV) MLA Naiba Konyak aser NPP MLA A. Nyamnyi Konyak nungeria shilem agia liasü.

MP Lok Sabha, S. Supongmeren Jamir-i Dzüdza semdang



MP Lok Sabha, S. Supongmeren Jamir-i Dzüdza semdangba mapang tangokba noksa angur.

Dimapur, Luroi/August 29 (TYO): Nagaland nungi Parliament (Lok Sabha) züngsem S. Supongmeren Jamir-i Brehostibarnü Kohima district nung Dzüdza yimsüng kübok alinen alua aliba tesem semdanga liasü.

Anogo ishika jakdang alinen alua National Highway 29 kanga mejungi anenbanga lir, koba Nagaland yimtiba indang takum lenmang ka amai lir.

MP S. Supongmeren Jamir meina Deputy Commissioner, Kohima; Joint Secretary (Road

& Bridges) Government of Nagaland; Executive Engineer (NH), Kohima; Additional Superintendent of Police, Kohima aser NHIDCL ketdangtsürtem oa liasü aser iba mapang pai Dzüdza Village Council chairman-i anir züngsemtem ajuru aser parnoki MP dang par tashi yari tensa ketdangtsüba indang lemsatepa liasü.

MP S. Supongmeren Jamir isa Western Angami People's Organisation lenirtem ajuru aser parnoki shisa lemsatepba pela

agizük aser parnoki iba alinen alua alidak yaritepba atema pelaba lemsatepa liasü.

Pai yimdaklir aser lokti tentet balala dang iba lenmang tekeratiba nung yanglushitsü atema temaba ketdangtsür den jembitsü ta ashi.

Sensaksema mapang tang alinen agi kongshia aliba tesem yanglutsü aser anepalutsü nunglokja aliba contractor temia tekeratiba nung iba lenmang yanglushitsü ta ashi.

Alinen ajanga nürburtem nem timtem jenti agütsüba ajiteta MP-i tekeratiba nung lenmang yanglutsü nüngdaker ta ashi aser iba tongtipang lenmang nung medaloka alirtem aser anasa alirtem lendong nungi kumzüka ayutsü shia liasü.

Maneni Working President Keviphreo K Kuotsu lenisüba kübok Nagaland Pradesh Youth Congress (NPYC) team-i kasa anogo Dzüdza alinen agi nokdanga aliba gari tem semdanga liasü.

Iba mapang parnoki tia maka tensa agi menepa alir senzüsemponger nem süngojemtsü agüja liasü.

Iba mapang parnoki taolen mali anendaka alirtem den tajungshi o jembia aser NPYC-i maneni yariteptsü ta ashi.

Mkg nung 'mental health' & 'substance abuse' indang shisarajem sentong ka agi



Miss Northeast 2023, Kr. Kenie Ritse aser Miss Nagaland 2022, Kr. Hikali Achumi na den sentong nung tongti shilem agirtem aser adenertem noksa nung angur. Mokokchung, 29th August, 2024

Mokokchung, Aug 29 (TYO): HQ IGAR (N) aküm nung 12 Assam Rifles-i ayongzüka yangi Mokokchung nung 12 AR indang Hentry Hall nung "breaking the silence campaign" omen dak rangloker 'mental health' & 'substance abuse' dak sentakba nung shisarajem sentong ka 29th Aug 2024 nü kaogo. Iba sentong ya Dept. of social welfare, GoN aser 'ACTS' telok den külemi yaritepa ayongzüik.

Iba sentong ya tongtibangsa lanurtem rongnung mental health aser substance abuse dak sentakba onük nung talisa tali rajemshidaktsüsü nükjidong yur ayongba ka lir.

Sentong nung Kr. Kenie Ritse, Miss Northeast 2023 aser

Kr. Hikali Achumi, Miss Nagaland 2022 nadi tongti o jembia liasü. Tena kadi 'mental health' ya koda tongtibang, aser kadi 'substance abuse' nungi jembua/pilaa alitsü alitsüba indang tagitsü onük aika bener arua tesentepertem ayongzüik.

Iba campaign first phase ya 12th Aug. 2024 nü Kohima yimtiba nungi tenzüka district balala nung agia arur aser iba sentong ajanga Nagaland nung aliba kin/nübur balala dangi iba osang perokshitsü nükjidong lir. Assam Rifles-i Nagaland nung nüburtem anema aliba tsütsü lenmang balala nungita arudar yamaji 'Mental Health Awareness' aser 'Substance Abuse' maparen nunga shilem

tajung agitsü tejangraba tulu aliba metetdaksü.

Tanü iba sentong nung department balala den Assam Rifles, mulungtet telok balala, Mokokchung DC aser SP nadi anir ketdangsurtem, Mokokchung district kübok school/college balala nungi tesayuri anir kaketshirtem aika dena liasü.

Tanü iba sentong nung Mokokchung DC, Thsuvisie Poji aser Commandant 12 Assam Rifles, Col. Rahul Gurung, Kirti Chakra nadia shilem agia jembi.

Nasha Mukt Bharat Abhiyaan (Drug Free India)-i achayangba tenangzüka (pledge) ka sentong nung adenertemi agia liasü.

Mokokchung DPDB senden September 4 nü amentsü

Dimapur, Luroi/August 29 (TYO): Ita shia amenba DPDB senden August aser September ita atema September 4, 2024 anüngdang 11:00 ako nungi tenzüka Deputy Commissioner, Mokokchung indang Conference Hall nung amentsü, ta Deputy Commissioner &

Vice Chairman, District Planning and Development Board (DPDB) Mokokchung, Thsuvisie Phoji ajanga sangdong ka nung metetdaksü.

Iba senden nung züngsem ajak medema arua adentsü ayongzüker, ta sangdong ajangasa ashi.

GPRN/NSCN (U) ajanga asükhü lemsateper

Dimapur, Luroi/August 29 (TYO): Chümoukedima district kübok Jharnapani nung August 27, 2024 nü tia maka gari lendong nung Mon district kübok Yakshu yimtsüing nungi Longang Konyak, Kilonser asüba asoshi mangyimer kibong den asükhü lemsateper, ta GPRN/NSCN (U) ajanga sangdong ka nung ashi.

meyongnem agütsüba nung pai shilem tulu agiba pelashishia agizüker.

Pa ya zünga-metetba nisung ka, bendanga agütsür meranga inyakba takum ka liasü aser Naga nungeri timtem ajuruba ajak nung yariteptsü teti mulunga liasü, ta sangdong ajanga ashi.

Pa tesasatsüka asüba ya NSCN/GPRN aser Naga nunger asoshi takoksa tulu lir. Pa asüba ajanga tawa adokdaksüba asüngtsü kanga tasak asütsü, ta GPRN/NSCN (U) sangdong ajangasa ashi.

DMC-i trade license yanglushitsü nenshia metetdaksür

Dimapur, Luroi/August 29 (TYO): Aiben nenshia shiaka/sangdongaka Dimapur Municipal Council (DMC) kübok dokan kibur/shishilembar/business establishments timba trade license meyanglushi (renew mesüi) shishilempaba maparen inyaksangshiba ajiteter, koba ozüing alema lir aser temerenshi lir, ta Thungchanbemo Tungoe, Chief Executive Officer, DMC

ajanga sangdong ka nung ashi.

Anungji ano maneni traders/business establishment shirnoksa tang tashi trade license renew mesüi ali, nenok ajak dang memenui pei license renew asütsü metetdaksür, ta ashi.

Iba totuyuba sülen manidak aibelener nem Nagaland Municipal Act, 2023 indang Section 130 kübok mela aliba ama merenshitsü, ta sangdong ajangasa ashi.

YNuklu Phom nem 'Changemakers for Commons' sempet agütsü

Dimapur, Luroi/August 29 (TYO): Nagaland nungi Y Nuklu Phom nem August 27, 2024 nü Ambedkar International Center, New Delhi nung The Commons Convening alidang 'Changemakers for Commons' narokum agüja liasü.

Community conservation nung tatishitsü tajung keta inyaktetba yong pa nem iba 'Changemakers for Commons' konang ya agüja liasü.

Changemakers kübok India nungi nisung tenet

bendena liasü. The Commons Convening ya Common Ground, Foundation for Ecological Security (FES), Tata Institute of Social Sciences (TISS), UNDP India aser Collaborating for Resilience amala lungjemer ayongzüka liasü.


Nüburtem lungjemer arok asoshi inyakba nung tajangzüik aliba tali jangjatsü, civic engagement temaba jenjangi ajungkettsü aser lungjemer mera agitsü asoshi ajungmesoa iba

sentong ya ayongzüker. Y Nuklu Phom-i Longleng District kübok Yaongyimchen village nung nüburtem arem shiruru pua achiba (shikariba) nungi arem shiruru kumzüka ayur dangi melendaktsüba ajanga Amur falcons aika kumzüka yutet.

Y Nuklu Phom ya biodiversity conservation atema aser LEMSACHENLOK, Longleng indang lenir asüba yong Whitley Award agizüker nübu tejangja lir.



Gen-AI The Women Entrepreneurs Network Nagaland (WENN) ajanga National Institute of Electronics & Information Technology (NIELIT), Kohima den lungjemer August 29, 2024 nü 'Entrepreneurial Success in Digital Age with Gen-AI' nungja agütsür City Centre Conference Hall, Medziphema nung Gen-AI training agüja liasü. Iba training nung wadang balala nungi tetsür entrepreneurs 25 aden, kong Daniel Meren, Addl Director NIELIT Kohima ajanga Digital Marketing, Cyber Security aser AI for Business amala onük nungi shisa lemsatepa liasü.



71st National Film Awards 2023

ENTRIES ATEMA JAOKER

Films and Writing on Cinema

ELIGIBILITY

Feature & Non-Feature Films

Certified by CBFC with English subtitles

Books, Articles/Reviews

On Cinema Published

01/01/2023 nungi 31/12/2023

(Anogo anaprong dener)

Osangtsüsang metettsü atema yangi call süang 011-26499378/357

(09:30 AM - 05:00 PM on weekdays)

Regulations atema www.mib.gov.in nung angutsü aser online Submission 18/09/2024 (nikongdang 5:00 ako) tashi alitsü.

Documents ajak agüja aliba address dangi yoktsüla:

National Film Awards Cell
Ministry of Information and Broadcasting
Government of India
Siri Fort Auditorium Complex
August Kranti Marg
New Delhi - 110049

Email: 71nfa2023@gmail.com
 website: www.mib.gov.in

chc 22201/11/0010/2425



NAGALAND HEALTH PROTECTION SOCIETY

Empanel süa aliba mozü kidang PM-JAY/CMHIS Schemes ajanga angutsü aliba teyari magütsüra, item mozü kitem nem temerenshi karbo agütsür asü ?

Hau, empanel süa aliba mozü kidang PM-JAY/CMHIS ajanga angutsü aliba teyaritem agütsütsü asoshi nangzüktepa renemba MoU aser guidelines nung shia aliba ama magütsüra mesüra iba sentong kübok anepaluba asoshi taa talila meshira temerenshi agütsütsü.

Itemji yamai inyaktsü :

1. Meshitaki inyakba mesüra temulung melemtetba mapatem bushisüngdangtsü.
2. Terenemba raksaba mesüra meshitaki inyakba anema tasüngdangba alitsü.
3. Terenemba raksaba mesüra meshitaki inyakba mapaji shitaka ta jangjatetra Empanel süa alibaji anentsütsü.
4. Senchi achiba – Aibelenba mesüra shitak manidakba shia senchi telatet ka achitsü aser anosa aibelenra senchi sen temloker achitsü.
5. Terenemba ken o mesüra MoU nung renemba teinyaktsütem raksaba anema temzüng ozüing nung aliba ama inyaktsü.
6. Aibelen tulu inyakertembo Blacklist-i yoktsü.
7. Aibelenba mozü kitem yimjak nung metetdaksütsü aser empanel süa aliba nungi agientsü.

Item mapatem ya Ministry of Health and Family Welfare/ National Health Authority nungi yokba tetuyuba nung ajemdaker inyaker. Tejangja tetuyubatem metetnüra, imlibilema yangi reprangangma - <https://cmhis.nagaland.gov.in/category/nha-guidelines>

Teyari nüngdakra, yangi agüja aliba number mashika ajanga phone nung mesüra

WhatsApp ajanga tongtepratepangma :

8880515011 | 8880515012 | 8880515013 | 8880515014



NIA-i India anema itdangiter-tem maneni bushisüngdang

New Delhi, August 29 (Agencies): Pakistan nung itdangitba network ajanga India nung defence dak sendakba tongtumbang miim o prokba ken o nung National Investigation Agency (NIA)-i state tenet nung tesem aika mita oa bushisüngdang, ta Brihostibarnü ketdangsertem sangdong ka ajanga metetdaksü.

India nung itdangitsü atema Pakistan dang nungi sen meshizüka agirtem anema Bodhbarnü NIA teams-i tesem aika mita oa bushisüngdang.

“Pakistan nung ISI ajanga India nung defence miim osang prokba ken o dak sendakba nung Gujarat, Karnataka, Kerala, Telangana, Uttar Pradesh, Bihar aser Haryana state tem nung tesem 16 mita ogo,” ta NIA sangdong ajanga metetdaksü.

NIA-i bushisüngdangba mapang nung mobile phone 22 den tongtumbang kulikaket aika puogo. Iba ken o ya 2021 küm January ita nung Andhra Pradesh nung counter-intelligence cell-i benokba sülen yaküm July ita nungi iba ken o

Artsü adener India anema asalentong yangluba dak sendakba nung Indian Navy indang tongtumbang miim osang kar proka liasü, ta NIA-i metetdaksü.

Yaküm July 19 nü NIA-i iba ken o dak sendakba nung tai tonglokja alir ana anema ken o benok, aser nisung ana rongnungji kabo Pakistan nung Meer Balaj Khan lir. Meer Balaj Khan aser Akash Solanki nati India anema itdangitba nung shilem agia lir. Yaküm November 6 nü NIA-isa kasa ken o dak sendakba nung Manmohan Surendra Panda aser Alven na anema-ken o benoka liasü.

NIA-i Panda bo puogo saka Pakistan nung intelligence agent, Alven bo tang tashi jenshia senzüdar, ta NIA-i metetdaksü.



August 29, 2024 nü Uttar Pradesh kübok Bahraich district nung tsünü ka puer aoba noksa nung angur. Tesüiba anogo 40 tsüngda iba district kübok yim balala nung tsünü telok kati tanur 9 ngusetba sülen Uttar Pradesh sorkari 'Operation Bhediya' tenzüka liasü aser tang tashi nung tsünü trok nungjagi pezübo puogo.

Gujarat nung tzünglu dak sendakba lendong nung asürtem 26 jungogo

New Delhi, August 28 (Agencies): Tesüiba anogo ishika Gujarat nung tzünglu maneni aruba ajanga nisung aika timtemdar; state nung ano tzünglu dak sendakba lendong balala nung nisung 19 süogo aser ibaji densemabo tang tashi nung ajak senteper asürtem 26 jungogo.

Tzumetsüng agi kongshiba tesemtem nungi nisung 17,800 shi aienshidaksüogo. Asürtem rongnungji nisung tenetbo Morbi district kübok Dhavana yim anasa tractor trolley ka nung toudak mapang tzumetsüng agi ponger aoertem liasü.

Bodhbarnü Rajkot nung kibong ka nungi züngsem asem gari nung toudak mapang nung tzumetsüng agi gariji ponger oa par asemongla asü.

Brihostibarnü India Meteorological Department (IMD)-i Gujarat kübok district 11 nung 'red alert' aser district

22 nung 'yellow alert' sangdongogo.

Vadodara district nungbo tzünglu aruba anenogo saka Vishwamitri ayong nung tzü tali mobanga ayimba ajanga kiyong aika nung tzü metsüngbanga lir.

Tzumetsüng tensa nung ajemdaker kümzükba maparen inyaktsü atema Gujarat state sorkari Indian Army column trok meshizüka liasü aser sepaitemji Dwarka, Anand, Vadodara, Kheda, Morbi aser Rajkot district tem nung lezmükja lir.

Iba dak alia National Disaster Response Force (NDRF) platoon 14 aser State Disaster Response Force (SDRF) platoon 22-ia kümzükba maparen inyakdar.

State nung tzü rizünga ayudak aser tzü tepdang 140 nung tzü tali atsüngogo aser ayong 24 nung tzü tali mobanga yimdar. Tzü-tepdang 206 nungi

122 nungbo tzü kanga tali metsüngbangogo.

State nung tzünglu maneni aruba ajanga gari lenmang aser train lenmang nung tzumetsüngba agi gari aser train junga mesenzüteter.

Osangbenertem den jembidang Minister Rushikesh Patel-i, Vadodara kija nung nisung 5,000 dak tema aienshidaksüogo aser nisung 1,200 kümzükogo, ta metetdaksü.

Ano külen Chief Minister Bhupendrabhai Patel-i ketdangsertem dang, tzumetsüng kodanga arema kümdir wara nokdangtsü atema mozü inang ta tuyuogo.

NDRF, SDRF aser Army dak alia Indian Air Force aser Coast Guard sepaitemia kümzükba maparen inyakba nung yaritepdar. Tang tashi nung nisung 17,800 aienshidaksüogo aser nisung 2,000 dak tema kümzükogo.

Chhattisgarh nung sepaitemi Maoists telungpur tetsür asem khaset

Raipur, August 29 (Agencies): Chhattisgarh state kübok Narayanpur district nung Maoists telungpurtem aser sepaitem tsüngda khatetpdang sepaitemi Maoists telungpur tetsür asem khasetogo, ta Brihostibarnü police-i metetdaksü.

Chhattisgarh kübok Narayanpur aser Kanker district na tsüngda arrotsülen Maad forest region nung sepaitem aser Maoists tsüngda rara.

Maad region nung Maoist telungpurtem aliba osang

lazükba sülen police aser aser sepaitem senteper telungpurtem mita ao, ta Bastar nung Inspector General, P Sundarraji metetdaksü.

Brihostibarnep 8:00 ako meta sepaitem aser telungpurtem tsüngda rara tenzüka liasü aser iba rara nung Maoists telungpur tetsür asem khasetogo; tang tashi nungbo sepaitem yiruba mesüra asüamaba osang mali, ta paisa metetdaksü.

Raraba tesem nungjagi Maoists telungpur tetsür asem tasü mang denji prangpong aser

injang aika ngutetogo, ta police-i metetdaksü. Taküm küm tenzüker tang tashi nung state nung Maoists 145 tepsetogo.

Anogo ishika tejaklen ang Union Home Minister, Amit Shah-i, sangküm küm tashi nungbo linük nung Maoists samatsütsü, ta sangdonga liasü.

India nung Maoists telungpurtemi timatem agütsüba state temji Andhra Pradesh, Bihar, Chhattisgarh, Jharkhand, Madhya Pradesh, Maharashtra, Odisha, Telangana aser West Bengal lir.



August 29, 2024 nü New Delhi nung External Affairs Minister S Jaishankar aser Israel Foreign Affairs Ministry Director-General, Yaakov Blitshtein na senden amendang tangokba noksa nung angur.

Arabian Sea nung cyclone tentetdar; Gujarat nung tzünglu arutsü

New Delhi, Luroi/August 29 (Agencies): Gujarat nung tzüyümkümlen nungi pilar Arabian Sea nung cyclone yipru tentetdar, aser ibaji ajanga linük anüolen tzüyümkümlen aliba state tem nung tzünglu sashia aruba den külemi yipru mopung aontsü, ta Brihostibarnü India Meteorological Department (IMD)-i metetdaksü.

Saurashtra aser Kutch region nung yipruji tanemtanemi anüolen tsütsüleni ghonda ka nung kilometer 3 kera odar, ta IMD-i metetdaksü.

“Yipruji maneni west-southwest tsütsüleni aoba sülen Kutch aser Saurashtra tzüyümkümlen Arabian Sea-i aontsü. Iba yipru ya August 30 nü ano tesashiba küma Cyclonic yipru akümtsü. Iba sülen maneni west-southwest

tsütsüleni oa northeast Arabian Sea tsütsüleni aontsü aser anogo ana tsüngda India nung tzüyümkümlen nungi pilatsü,” ta parnokisa metetdaksü.

August 31 nü Gujarat tzüyümkümlen aliba district aika nung tzünglu sashia arutsü aser south Gujarat region, Saurashtra aser Kutch nung mopung-a ghonda ka nung kilometer 65 tashi keraa aontsü, ta IMD-isa metetdaksü.

Taruba anogo ana tsüngda north Maharashtra tzüyümkümlen-a yipru mopung ghonda ka nung kilometer 60 tashi keraa aontsüa akok, ta weather department-i metetdaksü.



TIR YIMYIM YIMOBILEM (EDITORIAL)

DIMAPUR ROGONÜ, AUGUST (LUROI) 30, 2024

Naga yimten yakta latettsü imlar

Asenok Naga nungertem asoshi tangsa tang inyaktsüla mapa aika lir aser ajak dang rongdak nungdak tulutibaji Naga yimten tebilemstü tatem kuma latettsüba mapa ya asütsü, kechiyong asenok yimten tebilemstü yagi tanga terenlok mapatem inyaktsü nunga tebilemstü agütsür. Aji oda, yimten tebilemstü ya kokteta telemtetba tajung kati arutetra, iba jagiang tanü asen lima merenlokteti aliba tebilemstütem ya ka khen, ka khen ta kokteta aotsü. Iba tangatetba nung Nagaland state government-ia tangbo Naga yimten tebilemstü koka jembitettsü asoshi asoshi MLA 60 den Naga nung MP anaprongla aser yimten telok shia nungi teshimtet purtem shimoker telok tulu kuma longjemer jembitsü tenzükogo. Aji oda, Nagaland government tenung nung jembir Wb.KG Kenye-i ashiba ama, tangbo Naga yimten tebilemstü ya kokteta telemtetba kati arutsü atema state government-i shimba telok yagi Naga yimten nüchiso atema rarar teloktem o India government na tsüngda o tongdar ka amai dang mesüi, Naga nung loki lenirtem den shisalemsatepa telatetba kati arutsü merangra, atangji, Naga nungertemi mulungba nung yakta yimten telatetba kati arutsü imlar. Küm 64 jakdang Naga yimten nüchiso bushir telok Naga National Council dang aliba mapanga, Naga yimten tebilemstü koka latettsü atema Naga Peoples' Convention liasü saka parnokia India government o Naga National Council na tsüngda tangatetep kati marudakstüet ser Nagaland state ya kumtet. Ibayongji, tanü tashi Naga yimten tebilemstü agi asenok kangshir. Ajisüaka, ano külen Nagaland akümba ajanga Naga yimten tebilemstü tatembang kuma melatettetyonga, tang aliba Nagaland state government tashi nunga Nagaland nung alir yimten yimsüsürtem aser nübortem lenmang aisü nung tajangzük anguba angur. Aji oda, tanü tensa yaa küm 64 jakdang Naga yimten nüchiso bushir telok o India government na tsüngda tangatetep kati marutet timatempa den mesüktepa lir. Atangji, küm 64 jakdangbo Naga yimten nüchiso bushir telok ka dang liasü aser parnok den Naga nung nübortema ajak dena liasü saka tanübo Naga nung yimten nüchiso bushir telok kwiar mejangja kumogo. Iba jagi yimten tebilemstü ken o tembanga lemtettsü mapa tasakba-tasakba akümer. Ano, India government dak jilu tamajung ka reprangtetbaji Naga yimten nüchiso bushir telok tasen ka kümli aji jet ta agizüka temeten agütsüli ta asüba agi mapang tatsüka tsüngda Naga yimten nüchiso bushir telok metsü dak tali kumogo. Iba amaisa yimten telemtetba ka magitet odaktsü nungbo, mapang tatsüka tsüngda Naga yimten nüchiso temeten ken o yabo samatsü aser Naga nung telok balala tsüngda rara tulu adoktsü. Tanü asenok mapaji iba raraji matalokdangyongi nokdangtsüla. Aji oda, tanübo Naga yimten jenjang tasen aser tajungba ka latettsüba ya Naga yimten nüchiso bushir teloktemi kechi ashir ta masü mesüra India government-i kechi ashir ta masü, saka Naga nungertemi kechi ashir ta asübaji dang tongtibang asütsü, kechiyong yimten nüchiso bushibaji tangar atema masü saka nübortem asoshi lir. Iba tangatetba nung tang Nagaland government-i shimba Political Affairs Committee nung adenertemi nübortem nungi shisa agia yakta telatetba katibosa arutsü teimla tulu lir. Atangji, yimten ken o tasak asünungji, ajaki mulungba telemtetba ken o katibo marutettsüa akok, saka ajaki mulungba nung latettsü atadang tsürabur shin nung ashi ama, yartsüngsangertema mereprangshi aser sotsüa meyongshi ta süidaktsüra, küm papikaya senti taküm paikaya tenlaa Naga yimten nüchiso atema raraba mapa aser otsü ajak amajok kumadoktsü aser lanurtemibo tebilema mebilemtettsü. Iba amaji mataloktsü atema tanü Naga yimten nüchiso temeten atema India den jembirtemia pei tia aser jenjang angatettsüla aser Political Affair Committee-ia telemtetba aser telatetba kabosa agitettsüla.

OLEMSABANG

NAGALAND LIQUOR TOTAL PROHIBITION ACT 1989, ASER IBA WADANG NUNG ASENOK SHILEM

~ C. Walu Walling

Nagaland Liquor Total Prohibition Act 1989 ya Aolima nung mezüng tenzük. Iba jakdang August 17 1988 Mokokchung Football Ground nung Imlong Place tashi lanur 20,000 adenshia onoki Yi Mokokchung district nung meyokdaktsütsü ta ayimtena senzüa liasü. Nagalima nung lanurtemi ayongzuka agiba nütsüngji ibaji tulutiba liasü ta osang kakettem nung adok. 1988 ACYE Convention Impur nung adenshia Nagalima nung lanur tajung aika anojungi yi agi jemseta asüba den kibong aika nung palaluyuba, kibong telung nung tebangi shir meshima timtem zünger mezüngma yi ajanga bentsür aruba lendong nungi asüng lanurtem kumzüktsü tangatetba nung iba maparen ta tenzük. Iba mapang ABAM, ABTM, aser ACYE ta pei pei sasep nung sentong balala yanglur agiba mapang liasü. Anungji ACYE ajanga ABTM den lungjemer ABAM küm tatem Mungdang dangi bena Mungdang agizüka sentongtem mapa akümtsü Tsüngrem dang sarasadema liasü.

Mokokchung Dry kumdakjang ta ayimtenttsü mapa tenzük. Joko January 3, 1989 nungi Mokokchung Dry kumdakjang ta district administration den jembitsü atema Aoli lanurtem aika adenshia parnok Mokokchung Town Baptist Arogo tenla kima Tsüngrem dang sarasademtsü tenzük. Iba sülen January 4, 1989 Arogotsürtemi sarasadem tenzük. Iba anogo Ao arogo balala nungi arogotsür aika adenshia Yi agi pei kinungpurtem aser tanurtem jemseta südaktsüba atema tetsürtemi nüksü yima sarasademtsü tenzük. Iba mopungsem jagi Mokokchung Deputy Commissioner süngjema melitettsüa petsaprongmeso. Anjong tenari tashi lanurtemi akangbaji melangzü tashi nungbo nübortemji mit adokmesoa Deputy Commissionerbaji tang kimai anir alung ta asateptsü tenzük.

Iba telok anepalutsü atema ABAM-i tesayur aser lenir ishika shimteta parnok lenisüba nung maparen ajakji tiptema inyakba agi sentong ajakji takok ngua inyaktet. Parnok tenung idaki mezülur, saka 1989 January 3 aser 4 nung adenertem ajaki nüklai arua azüngtsü südi. Joko iba anogoji Mokokchung Deputy Commissioner Office kima lanur tetsür aser tebur jendi adenshia Mokokchung Dry tangsa Declare süang ta ayongzükba ajanga Mokokchung Deputy Commissioner-i nübortem akhangba ama Mokokchung Dry ta January 4, 1989 nung Sangdong.

Konyak nungerberbo 1988 küm tetenzüklen Tetsür Teloki anir Konyak Kaketshir Mungdang par tetsü-tebou nung Kaini agi putu aika raksadaktsüba den ano tang Yi agi lanur tajung jendi taküm samadaktsüba anema ola adoka joko Konyak lima nungi kaini aser yi mayoktsü lemteta mapa inyaktsü tenzük. Parnoki yi dokantema shibangja senzü. Anungji tanüa Konyak nungerberbo iba telemtetba kübok par lokti akang akanga noktaka lir.

Iba sülen Mokokchung district nung yi dokan shibangtsüba sülen manenisa parnok yi ayokba meteta parnok dokan mita or linük temzüng anema inyakba atema yi bongdang zünger mezüngmai lanurtemi bendena Tsüngrem tenung nung atakatema item bongdangtemji tepsaa entokmeso. Kodang yimjak nung yi mangu lanur tajung aika kaket shisatsü nung temulung agüja school aser College azüngtsü tenzük. Tanü parnokji Naga nung lenirtemji lir. Anungji asen kini Teyanglur Tsüngrem dang atemzükba tongtibang mapa ana: Nagaland For Christ 1959, aser Nagaland Liquor Total Prohibition Act 1989, anaji asen tsüraburtem tamang senmang ta ajaki kanga metsüngareta aser iba tenangzükbaji takok ngua otettsü aseni takok tashi teka amteper inyaktsü ya mapang tajung.

Saka Nagaland sorkari NLTP Act 1989 agiendi ta tang Nagaland Legislative Assembly nung jembiba anema tangar kini ang iba Act ya ajanga Naga nung kumzuka anir aruba indang jembiba asenoki angashia aser ngua aruogo. Asen nisungtem kwikati jembi, parnokiba iba Act ya agientsüla ta ang jembi ato na? Anungji ajak nung mezüngpur kin ka ama tangar matsüngdang maak masütsüsa alitsü ajak dang sangoktsür.

(Maneni asüng adok nung...)

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agitsü mepishir**

US nung Arogo kati züngsemtem indang medical sentsüh aotsüogo



Tennessee kübok Johnson City nung aliba Altar Fellowship nung Pastor, Mattie Montgomery (tiyong)-i Arogo züngsem ka den jembidang tangokba noksa nung angur.

August 29, 2024: US kübok Tennessee nung aliba Arogo kati Arogo nung züngsemtem indang medical treatment agiba sentsüh dollar sen million 8 jungnüa aotsüogo.

Johnson City nung aliba Altar Fellowship-i debt cancellation service ka den longjemer Arogo züngsemtemi tagütsütsü aliba medical bill ajakji dollar sen 50,000 agi alizük.

Osangbener den jembidang Altar Fellowship nung Pastor

Mattie Montgomery-i, anasa aliba County trok nung medical sentsühji Arogoi alizük, ta metetdaksü.

Medical sentsüh ajak aotsüba sülen Arogoi tajangzük angurtem dang shidi ajanga, “Yisui na meimer, onoki na meimer. Nü sentsüh otsübaji onok atema maongka liasü,” ta metetdaksü.

Pastor Montgomery-isa, Arogoi temeim mapa inyakba ajanga Arogo nung tainlonglong kati Khrista dak

mamanger tebu den Khrista osangtajung lemsatepteta liasü, ta metetdaksü.

Pastor-isa, tanga Arogotemia iba ama temeim mapa inyaka Yisu teka, tetsüng aser rongsen agi inyakba ama kasaji inyaktettsü imlar, ta metetdaksü.

“Timtem mapang nung parnoki Yisu sülen anidakertem den alitsü nüngdak, ta onoki nüburttem nem metetdaksüner,” ta pastor-isa ayongzük.

Pakistan nung tsüngrem mezüngmeshiba ozüng kübok Khristan ka apu

August 29, 2024: Pakistan nung tsüngrem mezüngmeshiba ozüng kübok yimdaklirtemi Khristan ka nem tai tongloktsüba sülen police-i nisungbaji puogo.

Arrshi küm 18 Khristan, Tabi-i Islam yimsü mezüngmeshiogo, ta Muslim nung kari pa nem tiyazü nung tai tongloktsü, ta International Christian Concern (ICC)-i

metetdaksü.

Kalaywala Kasur nung alirtemi Tabi-i Quran Lai otem zülua aliba shidi kar shisaa angu, ta Tabi nem tai tonglokja liasü.

Khristantemibo ibaji Muslim nungertemi tiyazü nung tai tongloktsüba lir, ta aitsür. Tabi apuba sülen iba tesem nungji tensa azüoktsü atema police aika yoka lir.

Taküm May 25 nüa

Pakistan kübok Sargodha nung Muslim nung telok kati Khristan tambur ka dak azükba sülen anogo ishika lir paji süadokogo. Khristan, Nazir Masih-i Quran kaketi nungi tapak kar rongdok, ta pa nem tai tonglokja liasü.

Lokti jagisa Masih'er jabaso, Sultan Masih indang tsüngsem factory den külemi par ki-a rongdokja liasü.

Burkina Faso nung Islamic teloki Khristan 22 tepset

August 29, 2024: Burkina Faso nung Islamic teloki nisung 150 dak tema tepsetogo, aser parnok rongnung Khristan 22 densema lir, ta osang ka ajanga metetdaksü.

Hokolbarnü (August 24) Islamic züngsem 100 dak temi Barsaloghó jila nung tesem balala amakdang tetsür-tanurtem aser taintem densema nisung aika tepsetogo, ta Khristan melungtet telok Aid to the Church in Need (ACN)-i metetdaksü.

Tesüiba küm 9 tashi Burkina Faso nung ozüng alema inyaker telok balalai nüburttem nem timtem agüja arudar.

2015 küm Islamic telok aser Burkina Faso sorkar na

tsüngda rara tenzüka liasü. al-Qaeda aser ISIS ama kiralongrar teloktem den sendaktepa aliba teloktemi timtem kanga agütsür.

Tesüiba küm 9 tsüngda nisung 10,000 dak tema tepsetogo aser nisung million aika jenshiogo. Kaya nung Bishop, Théophile Nare-i, tawa Islamic teloki amakba aitsüba den külemi August 28 anogo ya mangyimba anogo asütsü sangdonga liasü.

Putirisa linük nung meimchirtem amakba tatalokba ajak anentsü aser tesünap alitsü atema anogo asemnü tashi lumia sarasademtsü ayongzük liasü.

Nare-i sangdong ka ajanga,

“Ni nenok dang teimla mesamatsü ajungshir, iba denji külemi Tsüngrem nungi tesünap aser tashi angutsü atema sarasademtsü ayongzük,” ta metetdaksü.

West Africa kübok aliba Burkina Faso nung August 4 nüa prangpong amer telok kati Boucle du Mouhoun Region nungi nisung 100 dak tema puer ao aser August 20 nüa iba tesem amakba ajanga nisung aika jenshiogo.

Khristan melungtet telok ACN-i Burkina Faso nung tesüiba küm ka tsüngda project 76 yaria aruogo aser maneni parnoki Islamic rara ajanga kongshiba Khristantem yaria arudar.

ANOGO ABEN TSÜNGREM DEN

Nuso Ashiba

Saka item ajak tekangshitsü tetenzüker
Mathi 24:8.

Khrista kodang meyiba arutsü? Putu ajak nung iba tasüngdangba kanga shisadanger. Khrista tangsa arutsü ta bilemba agi Khristani inyakba ajak tesülen atsüngzüktsür. Khristai Pa kodang arutsü mapang shidakji mashi saka saksalema alitsü tamaitstütembo pai ashi. Mapangji mejangja saka Pa arutsüji tejanga.

Tatalokba kar ajanga Pa arutsü mapang anasa lir ta sayutsü ta Yisui ashi. Idakji raraba aser raraba osang alitsü; ayawara aser menoknok alitsü; Khrista asoshi Khristantem rishikangshitsü; tiyazü ainkar arutsü aser tiyazü sayutsü, aika mashileni anitsü; ozüng raksar jenti adoktsü, nisungtemi pei nükdang kechi tajung aji inyaktsü, yimsüsüba menden nung alirtemi ozüng raksartem azüoktsü makoktsü, temeim mokonga akümstsü (Matt. 24:6:-12).

Tatem mapangji nüsotsü tekangshi ama alitsü ta Yisui ashi. Tanur asoshi tashitsü atuba tali tali akümer, aser ibai maremtetti atur. Rara mesüra ayawara mesüra tiyazü tesayur adokba tetezü Pa aruba asenok den lir ta Yisui mashi. Itemji tetenzüker dang lir ta Pai ashi. Khrista maru tashi rara, menoknok aser ozüng raksartem tali tali adoktsü ta Pai ashi. Tatem nung Khrista arudang item ajakji tatem akümstsü. Raratem, ayawara aser meimchir mepetmesü ajak tatembang kati arutsü.

Yisui jembiba ajak asenok mapang nung ngua arur. Yisu arutsü asoshi khristantem saksalema atatsü mapang ka süra ibaji tanü lir.

Dimapur Area Aor Ordained

Minister Fellowship lemtet osang

Dimapur Area Aor Ordained Minister Fellowship Luroi 28, 2024 anogo nung Dimapur Ao Baptist Arogo nung Nagaland Total Liquor Prohibition Act, 1989 atema Mensem nung iba Act ya tanga mesüra tesüa Nagaland sorkari magiendaktsütsü ajaki mulungtepa mapa inyaktsü lemtetogo. Ajisüaka ibai nisung ishikati dang inyaktsüla mapa masü nungji Rongjui (September) 1 nungi tenzüka ita piyong Ordained Minister ajaki Tsüngrem dang sarasademtsü. Ano tamanger kari danga iba Act ya tagiendaktsü ta onok den külemi sarasadem nung shilem aginüra nenok ajak mulungsoa aser pelaseta agizüker.

Rev. C. Walu Walling
Secretary, DAAOMF

ICC-i Philippines nung Khristan missionary kibong ka yari

August 29, 2024: Philippines staff ka dang, tena tenzüka nung aliba asetkong ka nung wadang nung timtem tulutibaji temenen külemküjaba telok asetkong nung tesem balala anati loktiliba ajak amokbanger semdangtsü asoshi oli-ora alidang Khristan missionary tsütsü timtem ajangshir, ta apuani nati Khrista osangtajung prokba ajanga aika Khrista dangi anir arudar, ta International Christian Concern (ICC)-i metetdaksü.

Iba asetkong nungji missionary kibong jagi Tsüngrem tenzüka aruba sülen tawa tenati tena nüngdak balala International Christian Concern den lemsatepa liasü.

Missionary kibong jagi, nisung aikati Khrista agizükdar aser parnok rongnung temenen külemküjar teloktem nungi züngsemtem-a densema lir, ta metetdaksü.

Missionary kibong jagi ICC

Tenatisa par kidang Tenla ki amenoka tamangertem tekülem sentong agiba aser temenen külemer telok ana nungjagi külemer telok ana nungjagi tamanger tasenpurtem reshikangshiba lemsatep.

Tenatisa ICC dang, Tamangertemi Laishiba aika nüngdaker, iba denji külemi Khristan tasenpurtemji kümzüktsü atema security nüngdaker, ta metetdaksü.

Ajioda ICC-i missionary kibong nemji Laishiba 100 agütsüba den külemi tena oli- oratsü atema motorbike ka agütsüogo.

AO OSHI ANGAZÜKDAK:
TANÜ ANGAZÜKTSÜBA OJANG



Tamashi

(adj) shisa maka, junga meshisadang (foolish)

* Tamashi nisungi telemtetba shitak magitetter.

Tamashir

(n) shisa makar, matumarar nisung (fool)

* Tamashir nisungi pei taküm mapayur.

OLONG PAITEP # 6909

1			2		3		4		5
6		7							
					8				
9				10					
						11			
			12						13
	14								15
					16				
			17						
								18	
19									

TIPIEN

- 2. Teburtemi tejak nung awaba - (8)
- 6. T ___ em - (3)
- 8. Tzüak ayudak - (3)
- 9. Nüngdakba dang timba - (6)
- 11. Züina ao - (4)
- 12. Yangi tzu angur - (5)
- 14. Tangar dang nungi tali - (4)
- 16. Senyong masü - (6)
- 17. Oadokdi - (3)
- 18. Tzü tarok - (3)
- 19. Yimtaklir aikati iba ya ki den külemi yanglusemer - (8)

LANGTSÜNGLEN

- 1. Temejangdak - (6)
- 3. Nisung ka mapa inyaksü nübo - (4)
- 4. Azüntsü asoshi mejemba - (6)
- 5. Tesangwa agütsüba - (5)
- 7. Tila masü - (4)
- 10. Tebenjem tetsür chanu - (4)
- 11. Tekolak nung inok - (4)
- 12. Tetsüngda - (6)
- 13. Tangar inyakba ka inyak - (6)
- 14. Tim masü ta ashi - (5)
- 15. Asalendong - (4)
- 16. Tanü dangtsü - (4)

OLONG PAITEP # 6908 TELANGZÜBA

TIPIEN :

- 1. Telok, 4. Aluru, 6. Ozüng, 8. Emk,
- 9. Kin, 10. Teti, 12. Süir, 13. Jen,
- 14. Ola, 16. Talak, 17. Mazük.

LANGTSÜNGLEN :

- 1. Tenükjang, 2. Luden, 3. Kioiktsü,
- 5. Lenti, 7. Tajangzük,
- 11. Teronem, 12. Sempa,
- 13. Jahaz.



TANÜ LIMA YOKYAYUKSHIBA LIMA

Tayoker : Hello, Malik tanü Naga lima den apet mozü kar ni bena lir, anungji aliangma. Süpokrem mozüa bena lir, raksatsütsü mozüa bena lir, ano tazüktsü mozüa bena lir, ano tongtipangkaji sena melener, nai kü nem sen lakh ka agütsüra nibo sen lakh ana agütsütsü. Anungji nai item ya kü dang nungi aliangma!

Alokba : Hau, nai mozü tajung aika bena lir, saka nabo süpokrem mozüji tulus aser yimsüsür kar dangi bener odangang, aser raksatsütsü mozüji lokti tenzüker kar kidangi bener odangang, aser tazüktsü mozüji linük tenzüker telok kar dangi bener odangang, ano senjibo Arogo tenzüker kar dangi ang bener odangangno!

Tayoker : O Alokba !!!!!
~ Lilir : I. Kilang Ajem, Indisen, Dimapur.

Meghalaya: TMC lenir Mukul Sangma LoP akümtsü

Shillong, Luroi/August 29 (Agencies): Meghalaya Trinamool Congress lenir aser taoba Chief Minister Mukul Sangma, state legislative assembly nung Leader of the Opposition akümtsü renema lir.

House nung Congress pur nübu agi ajema küma taoba opposition lenir Ronnie V Lyngdoh-i mapang toktsüba sülen tang Sangma Opposition lenir akümtsü renema lir.

Trinamool Congress MLA pongu aser Lyngdoh-i pusemba sülen iba mapa akhangtsü asoshi MLA trok nüngdaka aliba Samgma-i nguogo aser Lyngdoh ya Opposition Chief Whip akümtsü imlar.

Speaker, Thomas Sangma-i parnok nütsüg timba akümba



Mukul Sangma

agizükogo aser iba ajanga Samgma officially shimtsü asoshi lenmang lapoktsüogo, koba anogo ka ana tsüngda ataloktsü imlar.

2021 November ita nungi 2023 küm tashi Opposition lenir mapa abenba sülen Sangma tang agi tanabenbuba iba mapa

abentsü renema lir.

Kasa mapang nung Lyngdoh-i Sangma pusemba metetdaksüogo aser ashiba agi, State Security Commission amala state nung lokti tentet balala den sendaktepa inyaksü asoshi opposition lenir ka nüngdaker.

Assam: AIUDF-i CM den ajurutep; state nung Muslims nunger kümzüka toktsütsü mepeshi

Guwahati, Luroi/August 29 (Agencies): Taoba MP Badruddin Ajmal-i anir All India United Democratic Front (AIUDF)-i, Assam Chief Minister Himanta Biswa Sarma dang state nung aliba Muslim nungertem nem security agütsütsü mepeshia asüngdangogo.

Mejangjaba lokti tentet balala aser fundamentalist teloktemi Muslim nungertem amokmerenba tali akümba sülen

party-i iba temepishiba ya agüja liasü.

Party-isa, Angh Lakshman Prasad Acharya dang item teloktem anema jenjang agitsü asoshi tezüluba nung takhangba ka agütsüogo. Item teloktem yagi Upper Assam nung Muslim nungertem amokmerener aser parnok dang iba tesem toktsür mora lendong tulu ataloktsü ta shia arudar.

Tezüluba nung takhangba

agütsüba nung AIUDF-i, item amokmerentem süiki ia bilemba lemsatop, koba ajanga kin o kin tsüngda tesunep nung aliba minpronger aser Muslim nungertem lendong bang nung toktsür, ta shiogo.

Maneni party-i, item amokmerentem bentettsü asoshi tangsa tang jenjang agitsü aser item loktitem kümzüka toktsütsü atema jenjang agitsü mepeshia asüngdangogo.

Aizawl nung sen crore 5.1 alang meth tablets apu



Aizawl, Luroi/August 29 (Agencies): Mizoram Police-i, Methamphetamine (Meth) tablets lakh pezü puogo, koba international shishilembadak sen crore 5 dak tema alang asütsü.

Iba ken o dak sendakba nung police-i Aizawl nung nisung ana puogo.

Plice sangdong ka ajanga ashiba agi, osang tejangja ka angazükba sülen CID (Special Branch) team kati meita aoba sentong ka benok aser khu abenba truck ka Kulikawn East Presbyterian Church anasa

sota liasü.

Meita aoba mapang iba team yagi "Meth" tablets asütsü ta temulung melemba temesepba mozü seret 39.25 pua liasü.

Jenjang atakdangba sülen iba ya international shishilembadak sen crore 5.10 dak tema alang asütsü ta nguteta liasü.

Iba temesepba mozü ya electric air coolers 17 nung inoker liasü, koba Myanmar den arrtsü anasa Mizoram kübok Champhai district nung Zokhawthar tesem nungi bener

arua aliba mapang apu, ta police-isa ashi.

Ken o dak sendakba nung gari anisang aser temesepba mozü agizüksang na puogo. Tena ya ka Champhai district aser ka Aizawl nung alir ta jangjaogo, aser tenaprongla police temi gari sota tesem nung pua liasü, ta kasa sangdong ajanga matetdaksü.

Aija alisang ana ya Narcotic Drugs and Psychotropic Substances Act kübok section 22(c)/25/29(1) dak ajemdaker aitsüogo, ta police temi metetdaksü.

GOVERNMENT OF NAGALAND

DIRECTORATE OF ANIMAL HUSBANDRY & VETERINARY SERVICES

NAGALAND: KOHIMA

NO. VET/EXTN/VFA-10/2024-25/1503-07/1967-71 / Dated Kohima the 29th August 2024

DECLARATION OF RESULT FOR 29th BATCH VFA TRAINING

The Department of A.H. & Veterinary Services has conducted examination for selection of the candidates to undergo 29th Batch of VFA Training during 2024-26. Basing on the marks obtained from written and oral interview, the following candidates have been declared as selected to undergo the said course at VFATI Medziphema.

1. General Quota

Roll Nos

Table with 10 columns of roll numbers and their corresponding marks for the General Quota.

2. BT Quota

Roll Nos

Table with 10 columns of roll numbers and their corresponding marks for the BT Quota.

3. Waiting List

Roll Nos

Table with 10 columns of roll numbers and their corresponding marks for the Waiting List.

Date of Admission - 4th to 6th September 2024. Classes will commence on 10th September 2024. Successful candidates must report for admission along with original documents (HSLC & HSSLC Admit Card, Marksheet etc). Admission will not be entertained in absence of the said documents. Further, if any candidate fails to take the admission on the above-mentioned date, it will be treated as non-acceptance.

Sd/-

(DR. ACHILA AO)

Director of A.H & Veterinary Services Nagaland : Kohima.

Biden adviser Sullivan-i China mitkar lenir ajuru



Beijing, Luroi/August 29 (Agencies): United States national security adviser-i China mitkar tekolakpur den Beijing nung senden mena ken o balala jembia alima nung tashi tait linük ana tsüngta tesendaktep akangshitsü nükjidong nung pai anogo asem semdangba tembanga liasü.

Jake Sullivan-i Brehostibarnü Central Military Commission indang vice chairman General Zhang Youxia ajurua liasü, kechiaser China ya US tembar Japan aser Philippines linüktem den security tsütsü mangatettep adoka lir.

Iba senden nung NSA-i Taiwan Strait nung "stability", "US commitment to freedom of navigation in the South China Sea", China-i defence industrial base nung Russia yariba aser Gaza Strip nung ceasefire tezüngzüktep ka agitetsü asoshi merangtepa indang jembia, ta White House sangdong ka ajanga ashi.

Taiwan onük nung Zhang-i pei sasa yimsü asüba asetkong jenjang ya 'red line' mezüngbuba lir, koba China-US tesendaktep nung majangdaksütsüla, ta tekumdangtsü ashi.

Taiwan nüchiso aser Taiwan Strait nung yimjung aser tashi ya mebutep ta pai ashi, ta China

indang Ministry of National Defense ajanga sangdong ka nung ashi.

"US-i mitkar tsütsü Taiwan den lungjemer inyakba anentsü, Taiwan nem nüknü agütsüba anentsü aser Taiwan dak sendakba nung otsü tiazü prokshiba anentsü China-i akhanger," ta Zhang-i ashi.

Jembishinü masüidang Zhang-i US tushia jembia aser "military security aser military-to-military" tesendaktep nung jenjang akaba indang ashi.

"Iba ama pei tebilemba lemsateptsü maongka anguba ya aiben majurur," ta Sullivan-i Zhang dang langzü.

Ketdangsur ana yagi tarutsü nung mitkar tanishirtem ajurutepa jembishinü akatsü asoshi achayangtsü pangjemtepa liasü.

Sullivan-i Brehostibarnü China Tir Xi Jinping ajurua liasü aser paia China-US tesensaktep meraksai junga alitsü atema nükjidong memelenshi lir, ta shia liasü.

"Kati ka den len tom nung ajuruteptsü atema US-i China den inyaktsü imlar," ta Xi-i ashi.

Bodhbarnü Sullivan-i China indang Foreign Minister Wang Yi den jembishinü aka aser iba mapang pai November 5 nü US tir election agitsü lia linük ana tsüngta tensa tajungba kudaktsütsü merangtsü

ayongzüke ta ashir.

Wang aser Sullivan nati yakta US Tir Joe Biden aser Xi ajurutepa senden amentsü indang jembia, aser shishilempaba tsütsü tangatetba balala aliba, Middle East aser Ukraine, China-i Taiwan nungi South China Sea tashi kibur akumba onüktema jembia liasü.

Region nung linük aikati South China Sea agi raktepa kibur akumtsü meranger. Saka China-i iba tzüyim ya timba amai par indang ta ashir.

China-i Philippine maritime operations anema inyakba athishia Sullivan-ia United States-i Indo-Pacific allies tem kumzüka ayutsü asoshi temlungtetba nung lir ta jangja-jangja ashi, ta White House-i ashi.

Wang-i Washington dang tekumdangtsü ashi, ta Chinese state media ajanga sangdong nung ashi.

"China sovereignty aser territorial integrity nung timtem agütsütsü asoshi United States-i linük balala den tezüngzüktep yanglua alima mamshitsüla, mesüra Philippines inyakshangshi bhukuma mejembitsüla mesüra maitsütsüla, ta Wang-i Sullivan dang ashi," ta state broadcaster CCTV ajanga ashi.

2022 küm August ita US ozüng yanglur tejen Nancy Pelosi-i Taiwan semdangba sülen China-i linük ana tsüngta osangtsüsang agitepba rakdang aliba mapang amalitep tali akatsü mechi tang item mera ya agir.

Linük ana tsüngta jembishinüba ya küm ka dak tema lir ang tenzük, koba taoba küm November ita Xi aser Biden na San Francisco nung senden ka nung ajurutepba sülen tenzuka liasü.

France Tir Macron-i anogo ana atema Serbia semdang

Belgrade, Luroi/August 29 (Agencies): Serbia den tesendaktep yanglushitsü atema France Tir Emmanuel Macron anogo ana atema Brehostibarnü Belgrade-iogo. European Union nung adentsü atema Serbia merangba mapang tang Macron-i iba linük semdang.

Anogo ana Serbia semdangba mapang Macron-i Serbia Tir Aleksandar Vucic den ken o balala sensak asemtsü, kong France indang Rafale fighters alizüksüba aser energy aser artificial intelligence dak sendakba nung ken o balala sensaksemtsüba densema lir.

May ita China Tir Xi Jinping-i Belgrade semdangba sülen Macron-i tang agi tanabenbuba Vucic den ajuruteptsü.

EU ya Serbia atema investor tem rongnung tulutiba lir aser Serbia nung meyirejang aika anüolen aliba linüktem indang company tem nung inyaker.

Bodhbar aonung Vucic-i ashiba agi, Rafale tayimtsü alizüksü aliba dak sendakba nung euro billion 3 shi alang ken o tang tashi metembang lir.

"Ken o ya jenjang dak masü saka guarantee kar dak sendakba lir. Iba ken o dak sendakba nung onok anogo pezü tashi timtema arudar," ta

pai state RTS TV dang ashi. Belgrade University nung history lecturer Aleksandar Zivotic-i ashiba agi, iba tayimtsü ayokba ya Soviet-Russian nungi pilaba temaitsü ka lir.

"Iba amala military technology ya sen agi dang alizüker masü, saka iba nung foreign policy aser tanga tenangzüktepba densema lir," ta pai ashi.

Russia-i Ukraine amak tenzükba sülen Belgrade-i military dak sendakba nung Moscow den tesendaktep raksaogo aser Ukraine amakba aitsüogo, ajisüaka tanga EU linüktem aser anüolen aliba linüktem ama parnoki Moscow nembo tenokdangba kecha magütsü.

Serbia indang military aser air force ya Soviet technology dak metaloker lir, saka parnoki Airbus nungi helicopter tem aser transport plane tem, Thales dang nungi radar aser France indang Mistral surface-to-air missiles alizükogo.

Vucic-i ashiba agi, Macron tenati energy aser artificial intelligence dak sendakba nung tesendaktep asoshi sensaksemtsü aser linük ana tsüngda tenangzüktepba aika yanglutsü.

Pakistan-i SCO senden nung adentsü PM Modi jaok

Islamabad, Luroi/August 29 (Agencies): Pakistan-i Shanghai Cooperation Organisation sorkar tekolaktem senden nung adentsü Ato Kilonser Narendra Modi jaokogo, koba Islamabad nung October ita ayongzüksü lir, ta Islamabad nung aliba Foreign Office Spokesperson ajanga Brehostibarnü ashi.

Hopta shia osangbener den jembiba ama Brehostibarnü jembidang Foreign Office Spokesperson Mumtaz Zahra Baloch-i ashiba agi, October 15-16 anogo amentsü aliba senden nung shilem agitsü atema linük balala tekolaktem jaoka osang yokogo.

"India indang Ato Kilonser Narendra Modi jaoka osang yokogo," ta Baloch-i ashi.

Shanghai Cooperation Organisation (SCO) heads of government meeting nung shilem agitsü atema linük karibo osang yokogo, ta Baloch-i ashi.

"Shir linükisa shilem agitsü osang agütsüdir iba sülen metetdaksütsü," ta lai ashi.

Kashmir ken o aser Pakistan nung arütsü alema kiralongrar adoka mapa tamajung inyakba mechi Islamabad aser New Delhi ya mapang talangka nungi tesendaktep mejungi arur.

India-i kidanger linüktem den tesendaktep tajung aliba ama Pakistan den liner ta ashir aser iba ama alitsü atema kiralongraba malitsü aser tsükchitep malitsü Islamabad dak keta lir ta ashir.

SCO Summit sülen SCO züngsemtem tsüngta senotsü, rongsenketzüng, socio-cultural aser humanitarian cooperation atema ministerial meeting ka amentsü aser linük ketdangsurtem senden balala amentsü.

SCO nungya India, China, Russia, Pakistan, Kazakhstan, Kyrgyzstan, Tajikistan aser Uzbekistan lir aser iba ya tashi tulu aliba economic aser security bloc ka lir, koba transregional international organisations tulutiba rongnung ka ta züngshir.

India den tesendaktep indang asüngdang dang, "Pakistan ya India den indang-indanga tesendaktepbo mali," ta odongtari langzü.

Indian Parliament-i August 5, 2019 nung Article 370 agienba sülen Pakistan-i India den tesendaktep mejungi akum, kechiaser iba telemtepa yagi kidanger linük ana tsüngta jembishinütsü tensa tamajungba kumdaktsütsü ta Islamabad-i amanger.

Kros College, Kohima nung dart asaya amenokogo



Dimapur, Luroi/August 29 (Agencies): August 29 nü National Sports Day amungba mapang Nagaland Darts Association tawabangba kübok Dynamic School of Darts-i, Kros College, Kohima nung Darts asaya introduce sütsüba den iba asaya amenoksüogo.

DSD aser NDA amenokba sülen College management-i, asaya dak sendakba nung tangazükba balala agütsütsü aser asayartem nem asaya indang tatongi metetdaksütsü atema DSD nem mapang ajunga bendanga agüja liasü.

Sentong nung Imjungmeren-i, National Sports Day tepela anogo salem ajak den lemsatep aser college nung Dart asaya benoktsü atema maongka agütsüba atema kanga pelaba

lemsatep. Paisa, Nagaland nung Naga Darts asaya indang puti otsü tatsü agi metetdakja liasü.

Paisa, Kros College ya educational institution tem rongnung Darts asaya benokba college mezüngbuba küma otsü tasen ka yangluba atema college nem tenüngsang agütsü. Iba anogo Darts asaya den külemi Taekwondo asaya-a amenoka liasü.

Vikhor Tapa-i asaya indang rules & regulations tem metetdakja liasü. Microphone ajanga guidelines tem metetdaksüba mapang DSD & NDA züngsem (Wabang Paul/ Neibei Solo/Aomeren/ Imjungmeren and Neiketou Suohu) pongu board shiai ao aser asayaba yimya sayua liasü.

Training tom tashi nung

sempet tajung aketba asayar karbo jangja liasü aser iba den temulungtetba tulu aliba asayartema kar jangja liasü.

Sentong nung asayar tasentem aser training agütsürtem tanen makai darts onshishia liasü. Sentong tatem i college aser NDA na tenangzüktepba ka yanglu aser college-i, Annual Nagaland Darts Association Tournament, koba September 14 aser 15 nü La Colline, Old Minister's Hill nung asayatsü lir, iba asayamung nung shilem agütsü atema college nungi asayar tajungtiba pongu yoktsü ta ashi.

Kasa mapang nung NDA-ia, Kros College nungi asayartem angati dang asayadaksütsü atema mulunga agizüka liasü.

Nagaland nung National Sports Day mungogo

Kohima, Luroi/August 29 (TYO): Bodhbarnü Nagaland nung National Sports Day 2024 munga Directorate of Youth Resources and Sports ajanga Indira Gandhi Stadium Kohima nung school tanurtem asoshi athletics meet ayongzüka liasü.

Kohima nung aliba school 12 - Fernwood School, Mezbur HSS, G Rio HSS, Mt Hermon HSS, Dainty Buds School, Chandmari HSS, Northfield School, Coraggio School, RDNUMS, Vineyard School, Don Bosco HSS aser Minister's Hill HSS nungi

kaketshir 309-i asaya tabu balala nung shilem agia liasü.

Iba anogo Class 7-8 aser Class 9-10 category lemsar 100M, 200M, 400M, Long Jump aser Triple Jump amala nung toktepa liasü.

Iba sentong tenzükja YRS Director, Kethosituo Sekhose-i jembidang, state nung National Sports Day ananü amungtsü, tanü athletics meet aser asüng sports award ceremony agütsü, ta metetdaksü.

Tanü sentong ya Chief Electoral Office (CEO)

Nagaland aser YRS lungjemer ayongzük, ta pai ashi.

CEO office-i kaketshirtem arishi küm 18 ajungdang pei vote temeden angateter lidaksünür, ta pai ashi. Iba asayamung nung Don Bosco HSS-i Gold medal 8, Silver pezü aser Bronze medal asem nguteta parnok overall champion sangdong.

Northfield School-i Gold pezü, Silver pongu aser Bronze asem nguteta tanabuba jenjang ngutet aser Chandmari HSS-i Gold ana aser Silver ka nguteta tasembuba jenjang tongtet.

Darwin Nunez nem asaya 5 atema tenokdangba agütsü

Luroi/August 29, 2024 (Agencies): Liverpool nungi Uruguay nung striker Darwin Nunez nem South American confederation CONMEBOL-i asaya pongu atema tenokdangba agütsü aser senchi chiogo. Copa America semi-final nung asaya repringertem den züktepba nung shilem agiba atema pa nem iba temerenshi agütsüogo.

Pa den tanga asayar pezü nema telokdangba agütsüogo aser ajak senteper nisung 11 nem temerenshi balala agütsüogo. Charlotte nung Uruguay aser Colombia na asaya tembangba sülen asaya repringertem den züktepba bushisüngdangba sülen tang item asayartem nem tenokdangba agütsüogo.

Bank of America Stadium nung nüburtem mena aliba

tesemi tua asaya repringertem den züktepertem rongnung Nunez-a densema liasü.

Tenokdangba agütsür ajak dang nungi Nunez nem tesashiba merenshiogo. Tanga asayartem nem ya asaya pezü aser iba dang nungi tejemba atema tenokdangba agütsüogo aser senchi dena chiogo.

Midfielder Rodrigo Bentancur, shiba England nung Tottenham nungi asayar, pa nem asaya pezü atema tenokdangba agütsüogo aser kasa mapang nung Mathias Olivera, Ronald Araujo aser Jose Maria Gimenez nung nem asaya asem atema tenokdangba agütsüogo.

Nunez dang senchi USD 20,000 achi aser tanga asayartem dang ya senchi USD 16,000 nungi 5,0000 tsüngda chia liasü.

Asayar trok dangbo senchi dang chia liasü.

Iba den bendenloksema Uruguayan Football Federation danga senchi USD 20,000 chiogo, koba revenue aser prize money nungi agizüktsü.

Uruguay nung central defender Gimenez-i ashiba agi, mangatetep adokba tesem nung asayar kinungertem mena aliba ajanga parnok kümzüktsü mechi asayar trok ya iba tesemi soketa tua liasü.

Temerenshi agütsüba ya mepishitetsü, saka CONMEBOL-i, iba tenokdangba agütsüba ya kodang nungi tenzüktsü iba indang osang magütsü. CONMEBOL-i ayongzükba asayatem nung dang parnok masayartettsü aser domestic asayamungtem nungbo asayartettsü.

Jonny Evans international asaya nungi anener

Luroi/August 29, 2024 (Agencies): Manchester United defender Jonny Evans-i Bodhbarnü pa international football asaya nungi anentsü telemtetba agiba sangdongogo.

Pa Northern Ireland tenüng nungi asaya 107 nung asayaba sülen tang asaya nungi anener.

Arishi küm 36 tain asayar ya Northern Ireland team-i 2006 küm September ita Spain team 3-2 agi akokba asaya nung mezüngbuba asaya aser pa Euro 2016 finals asayaba team nunga densema liasü.

Pa tatemsa June ita Mallorca nung Spain goal 5-1 agi makokba asaya nung shilem agia liasü.

Kasa mapang nung Evans lenisüba nung linük team 15 ben asayaogo. Pa Northern Ireland tenüng nungi 107 ben asayaba mapang asaya 106 nungbo tetenzük nungi asaya aser pai goal 6 tashi idakja liasü.

Taruba hopta Nations League nung Luxembourg aser Bulgaria na den asayatsü aliba asaya atema Northern Ireland manager Michael O'Neill-i asayartem tenüng mesangdong tsüngda Evans-i pa international asaya nungi anenba sangdongogo.

"2006 küm onoki Spain akokba asaya nung mezüng




asayaba nungi tenzüka 2024 küm June ita tashi linük tenüng nungi asayartetba ya maongka tulu ka liasü," ta Evans-i ashi.

"Linük tola semer asaya 107 nung Northern Ireland nung tenüng nung asayartetba ya ni atema tetushi tulutiba lir. Fan tem ya alima nung tajungtiba lir. Nenok ajak tenüng nung ni kanga nema danga asayaogo," ta paisa ashi.

Evans, shibai Manchester United den ano küm ka atema tenangzüktepba yangluogo, pai ashiba agi, pa lanuwa nungi asayaba club-i maongka magütsü asübo pa club asaya nungi dena anenadoker lila.

Evans ya lanuwa nungi Manchester United nungi asayar aser pai Champions League, Premier League asem aser English League Cups ana kokogo. Iba sülen pa 2015 küm nungi tenzüka West Brom aser Leicester nungi asaya aser 2023 küm United-isa meyipa arua taoba season FA Cup kokogo.

Bournemouth-i Chelsea goalkeeper Kepa loan nung anirogo



Luroi/August 29, 2024 (Agencies): Bournemouth-i, Chelsea goalkeeper Kepa Arrizabalaga season ka atema loan nung anirogo.

Arishi küm 29 tain Kepa ya alima nung sen timtiba agi alizükba goalkeeper lir. Pa 2018 küm Athletic Bilbao nungi pound million 71 agi alizüka liasü.

Iba hopta Spain nung asayar yagi Chelsea den tenangzüktepba yanglushiogo, koba 2025 season temangba sülen tembangtsü liasü.

"Ni Andoni Iraola kanga junga meteta lir aser iba ya ni idaki aruba kuli rongnung ka lir, pai iba club dak kanga temulung asüba jembia arudar," ta Kepa-i ashi. Pa Bournemouth coach Iraola kübok Bilbao nung asaya liasü.

"Ni iba club nung onok fan tem matsüngdang asayatsü atema renema lir.

"Takok karbo ngua küm tajung ka asütsü imlar atar," ta pai ashi.

Pa taoba season Real Madrid nung loan nung oa asaya, kong pa Thibaut Courtois melena asaya 20 nung asaya aser La Liga o Champions League naprongla koka liasü.

Chelsea den tenangzüktepba yanglyushiba sülen pa Cherries nungi loan nung asayaba sülen angati aotsü aliba nungi jenbuogo.

"Kepa amala asayar tajung ka AFC Bournemouth-i anir arutetba atema kanga pelar," ta Cherries chief executive Neill Blake-i ashi.

"Pa azünga aliba onoki metetal liasü aser pa loan nung club-i anir arutsü atema maongka agütsü tejangraba liasü. "Pa ya asayar tajung ka bendenloksema asütsü ta amanger," ta paisa ashi.

Real manager Carlo Ancelotti-i, Spain nung asayar den tenangzüktepba yanglushinüa liasü, saka iba inyakyim ya Andriy Lunin-i club toktsüba dak keta liasü.

Kasa mapang nung Kepa-i July ita Saudi Pro League club Al-Ittihad-i aotsü asoshi maongka agütsü magizük.

BILEMDANGANG

"Kümdanga alirtem lendong nungi jenbor."